

湖
海
文
傳

湖海文傳卷五十四

青浦王 昶德甫輯

墓誌

光祿大夫 經筵講官太子太傅東閣大學士兼工部

尙書陳文恭公墓誌銘

彭啟豐

稽古三代忠貞篤棐之臣罔不終始典學懋明厥德用能左右宣力允孚於萬民自秦以降法令滋章當塗之士苟合時變詩書所陳動謂迂濶木末橫分內外決裂學失其統而人才壞毒流於民非一日之故也

聖皇御世大道重光三三大臣往往能古訓是式以忠實心達於政事贊太平之功茲非所謂咸有一德者與臨桂陳文恭公當

今皇帝時任節鉞最久已而入相當世士大夫蓋莫不推公之學以爲有古大臣風公固未嘗以學自名而人之推公者覘於其政而知之也公以雍正元年舉鄉試第一成進士選庶吉士明年授檢討遷吏部驗封司郎中攝文選考功兩司公正有聲七年遷浙江道監察御史在臺中所陳奏務持大體監生舊有考職之例試者多屬人代作

世宗知其弊勅令自首而州縣吏胥藉是爲擾害公請止禁其將來而免其自首

上召見徵諸再三公申論甚晰乃允公奏

上以是知公命以御史知揚州府得便宜奏事已而丁父憂上官留之辭不許旋授江南驛鹽道仍帶御史銜攝安徽布政使又丁母憂奉命留任因乞假歸葬十一年授

雲南布政使乾隆元年以吏議降三級授直隸天津河道五年遷江蘇按察使明年授江西布政使甫到官遷甘肅巡撫未行調江西八年調陝西十一年調江西尋調湖北入覲時川陝總督慶復征贍對陳奏軍事多隱蔽懼公發之乃劾公十二罪部議落職

上原公命留任明年再調陝西權陝甘總督十五年授兵部侍郎仍留巡撫任其冬入覲會河決陽武

上命公權河南巡撫往來河堤塞決口十七年調福建十九年復調陝西明年調甘肅再調湖南二十一年又改西安明年調江蘇入覲已而遷兩廣總督疏辭不許二十三年以總督銜還江蘇巡撫任加太子少傅明年以捕蝗案削總督銜二十七年以失察泮墅關奸胥部議落職

上命留任尋復調湖南權兩湖總督明年遷兵部尙書入京
改吏部公在外三十餘年歷省十有二厯任二十有一所至
之處無間久暫必究悉於人心風俗之得失及利害之當與
革者籌其先後以次圖之每有興作人多以爲難成旣而輒
就理或當更代卽以聞於朝責成受事者其察吏甚嚴然
所舉劾必擇其尤不肖者一二人而他吏率凜凜就法惟恐
及己公之學以不欺爲本與人言政輒引之於學以爲仕卽
學也盡臣心焉而已故其所施於家國上下之際者務各得
其理人咸安之在揚州以廉惠爲治淮揚被水民多流移公
奏請民所過處官給口糧護送回鄉里得補入賑冊報可造
獄舍置田以益囚糧先是鹽使者令淮南於稅額外歲輸銀
助國用自雍正元年始積數十萬注冊報部然實不以時

納及奉部檄移取始行追徵公言新舊相仍虧欠日積請自
今停輸助之款以恤商人頃之

詔如公請在雲南時方

用師猥夷運糧者苦道遠公改爲短運遞運法民便之山有
銅廠向召民開礦以資鼓鑄後民苦廠官煩苛工費薄遂相
戒不前公請量加工費除抽課外聽得自賣礦銅民爭趨之
已而更鑿新礦銅日盛遂罷買洋銅之令立義學七百餘所
刻孝經小學及所輯綱鑑大學衍義諸書頒行各學令苗民
得入義學教之書俾通文告其後邊人及苗民多能讀書取
科第公之教也初公之葬親歸也奏廣西墾荒之弊時外吏
多以勸墾爲功廣西報墾者少巡撫金鉷請令罪廢職官及
外省官生墾田報部以額稅抵銀得官於是貪利者多與有
司相結按額荒冊責民報墾給之工本卽以爲已功又訪民

間田浮於稅者冒爲新墾起科報部多得官去報者至十餘萬畝然田不增而賦日益民甚病之公目覩其弊奏請罷前例

世宗命言之督臣尹公繼善分條定議會撫臣勘驗虛實今上初元公恐撫臣尙護前失再上奏言有司勸民報墾百無一實又粵地磽薄一年耕必以兩年息地力計三四畝始抵膏腴一畝之利若聽其冒墾勢不能支民必流散請將報墾抵捐之田盡數豁除不煩再勘惟民之願自墾者聽之勅部密議而撫臣申辨至再公復極論其非是

上以公粵人累陳粵事恐啟挾持有司之漸因有天津之命旣廣督楊公超曾與新撫楊公錫綬會奏豁除抵捐之田一如公請公在天津訪求水利時乘小舟沿河上下嘗曰老

河兵是吾師也河間滄景諸州最窪下恃隄防爲衛公相其
夷險築遙堤月堤縷堤又行放淤之法汎水盛漲多挾沙而
行導之由左口入堤停水沉沙復放水從右口出如是者數
四窪地悉平滿成膏壤又計北河全勢議濬黃河故道多開
溝渠俾水歸於河河歸於海庶久遠無患害司河者以費煩
寢其議爲江蘇按察設弭盜之法重誣良之令嚴禁親喪不
葬及火焚親柩者在江西歲饑糶常平倉粟令富人毋遏糶
遣官告糶於楚且招川湖之商人各載米至更設廠賑粥發
帑修城垣築堰埭令民就食於工其他在陝廣諸省遇荒歲
酌盈劑虛以濟民食多此類也南昌城南羅絲港爲贛水所
趨善衝突建石隄以禦之左蠡朱磯當衆水之衝往往泛濫
爲災亦築隄百丈水患稍平江西居人族大者多立宗祠置

公田以通有無然好訟費皆出於公田公仿呂氏鄉約令各
舉賢者爲族正平其鬭爭導以禮法治陝西尤以農桑爲先
務陝西本古蠶桑地近世漸廢棄布帛皆資東南諸省公立
蠶局募江浙善蠶織者導之令民種桑養蠶不能自織者賣
絲於官頃之利漸著西安華州織縑充歲貢又勸民養山蠶
種山薯儉歲以充食又修治渠泉製水車教民戽水之法鑿
井二萬八千八百有奇旱歲得以溉田河南歸德地窪下與
宿遷爲鄰故有巴溝以通下流久之淤塞公在河南疏巴溝
歸德賴之旣至福建值米貴內地俱仰食臺灣商人自臺來
者例一舟不得過六十石關吏因而厲之公請弛禁以便民
從之在湖南歲大熟適江南饑公請發濱水倉穀二十萬石
以濟之買民間穀還之倉又招民墾雲龍山下荒地禁洞庭

居人壅水爲田以寬湖流水不爲患初撫江蘇時吏治刑弊公率之以勤立期限以清案牘興其廉者能者懲其貪墨者而入知奮患蘇俗好華爲具條約宴會服御不得過度止婦女毋遊觀禁僧道爲靡曼之音而痛懲其淫者州縣官故以收漕爲利甯乾沒無已自尹文端公爲巡撫時極意梳剔所部肅然至公申明舊章民用不擾自公去後有司稍稍得自便而民乃益思公不置也前公撫江蘇者在我朝推湯文正張清恪爲最賢然二公俱遭讒構賴

聖祖曲全之亦旣不安其位矣公遭逢勝於二公爲

天子勤求民瘼彌縫補救矻矻不怠未嘗與人立崖異要自不爲苟同而人莫不稱公以爲二公之亞也公治南河大要因其故道開通淤淺俾入海迅疾幹河支河互相貫輸俾毋

阻塞在淮揚所請疏濬諸河甚衆其支河督民各開小溝以達於幹時其蓄洩徐海諸州多棄地異時河流未通遇雨輒淫溢河既濬水有所洩令民以開溝之土築圩圍成腴田中通涵洞爲旱潦備其窪下不能避水者令民改種蘆草裁其糧賦至築堤岸修閘埧多因地勢爲先時之謀奏上輒

命與河臣議行之其在蘇州議開徐六涇白茆口以洩太湖築崇明土塘以禦海開諸州縣城河以通渠皆利民之大者公在吏部巨細無不詳審所司持案牘白事當機立斷無留難旋加太子太保二十九年

上特設漢協辦大學士以命公三十二年遷東閣大學士兼工部尙書公在

上前所陳奏雖子弟不盡聞其他修舉職事非有關民生休

戚者茲弗著三十四年公有疾屢乞歸

上慰留再三三十六年春病甚始聽致仕加太子太傅食俸如故

賜詩及冠服

命公孫蘭森送公歸會

上東巡公由潞河南下送

駕武清寶稼營

上慰問良久乃行六月三日薨於兗州之韓莊

上聞憫悼

詔入祀賢良祠

賜祭葬諡曰文恭公諱

宏謀字汝咨門有古榕因號曰榕門先世湖廣人明末避亂

遷廣西家臨桂西鄉橫山下曾祖諱道威祖諱世耀父諱奇

玉俱

贈資政大夫河南巡撫曾祖妣周氏祖妣駱氏妣劉

氏皆

贈夫人公早歲刻苦自勵能文章內行修飭爲諸生

卽以澤物爲己任常曰吾生平恥作自了漢及入仕益講求

經世策所與交多當世偉人慕古人以人事君之義奏薦陳

法屠嘉正李元直王喬林任宏業衛哲治俱可大用京察自
陳舉雷鉉潘思渠自代

上詔求明經之士公再舉陳法及孫景烈世以公爲知人所
至尤加意書院厚諸生餼聘賢者爲之師導以正學時至而
面命之患諸生文不衷於理每試士必爲發明孔孟之旨以
反身實踐爲歸他如社倉育嬰養濟諸堂必爲之計畫有無
慎擇主者俾無以虛文塞責蓋公之惠於士民者如此此可
以觀其學矣公著書有養正遺規教女遺規以訓於家有訓
俗遺規從政遺規在官法戒錄以施於民有學仕遺規以砥
世之仕而不學者其奏疏文檄具載培遠堂存稿中公薨之
年七十有六妻楊夫人先卒一子殤以兄子鍾珂爲後乾隆
六年舉於鄉孫二人蘭森官刑部山西清吏司主事次蘭懋

蘭枝曾孫二人兆熙定熙女六人太常寺卿謝溶生太學生
蔣本廉縣學生曹云琰秦之埤陸之燦劉某其婿也曾孫女
二人長適莘洽中啟豐繼公入翰林與公先後同朝知公審
又以養母歸得親被公之化不忘於心公喪過吳門旣爲詩
以弔之鍾珂將以三十七年二月朔日葬公於其鄉東畔嶺
之原而先以墓志請義弗敢辭銘曰

太平元老克承天休日嚴祇敬以告嘉猷公自文學遂隸天
官羣吏之治旣詳且殫

帝選明德靖其正直公始親民獨攝諫職上德下情公處其
間功雖方隅補天下患公勞于外之翰之屏入爲平章老成
典型 恩命存至退若無憑乃心報稱夕惕晨興豈無盤
錯公忠不避豈無細過

帝信不忌昔有先正如湯如張公繼厥成行業彌光世澤之
長沐浴高厚易名司勳千秋永久

內閣學士張公墓誌銘

姚鼐

故資政大夫內閣學士兼禮部侍郎桐城張公者 贈光祿
大夫諱士維之曾孫 贈光祿大夫諱秉彝之孫而太傅太
學士文端公之子也雍正元年 恩詔開會試科時文端
公薨公之兄太保文和公已爲戶部尙書充會試考官矣公
以舉人例避不與試值 特命官別試迴避舉人於是公
成進士改庶吉士授編修遷左贊善厯翰林院侍讀學士詹
事府詹事

今上卽位以公爲工部右侍郎公在翰林常充 日講起居
注官起居注素無條例爲者繁簡任意漏遺冗贅不稱史體

公精思爲之寒暑在館十餘年編載詳贍

上以爲善於其職於是以前工部侍郎兼起居注官事 本朝

官不爲翰林而仍職注記者獨公爲然爲工部侍郎數年轉

內閣學士兼禮部侍郎又二年遂告歸公爲人誠樸篤謹細

微必慎每當入朝自書職名讀之曰某官張某又屈指計

之曰幾字視紙上三四而後敢出奉使督江蘇學政遇試士

日公服竟日燕處不脫人問之公曰取士國重典也敢忘其

乎其爲侍郎謹奉法度而絕私阿旣告歸則益以舊德篤行

自守所爲喪祭禮制多合於古足爲法式其自奉甚陋或人

所不堪雖其家人皆竊笑之然至族黨有緩急出千百金不

惜也未嘗私受人一錢門生某爲江西巡撫過公居奉數百

金爲壽公曰吾幸足衣食安用汝金爲又有以人蔭寄公者

公曰吾生平無病烏用蓑少爲宰相子久居京師冠蓋之間而終無世故之態遇人無貴賤率意而言必忠必信是以天下之士皆爲公長者公諱廷瑒字桓臣兄弟六人其四皆貴長少詹事廷瓚仕

仁皇帝與文端公同時次太保大學士廷玉次禮部侍郎廷璐太保禮部侍郎與公皆仕

憲皇帝及

今上最久公之歸也禮部侍郎及太保前後皆告老而公最後沒

上聞顧謂左右曰張廷瑒兄弟皆舊臣賢者今盡矣安可得也因歎惜久之公卒於乾隆二十九年八十有四夫人吳氏子二長若泌舉人次若渠副榜貢生以乾隆三十八年某

月日合葬公夫人於桐城北投子山麓銘曰

德祿以居才託其餘取安吾心不爲人夸士誰能然惟公之行繼成於學始秉其性再世卿相家胡不襲厚植根苞天則祐之我銘其幽所陳者信後世識之以固無盡

光祿大夫 經筵講官吏部尙書諡文肅王公墓誌銘

汪由敦

乾隆二十一年夏吏部尙書臣安國言臣父卜葬於天長縣西有年矣墨食不協迺有後艱願得歸遷兆域以展臣私皇帝曰明歲春將南巡江淮汝其從是兩盡也曷待之公拜稽首公素羸病咯血越數月疾大作疏請解職

上知不能視事命從容就道於是朝之卿士咸惜公之去而願公之遄有喜也二十二年春正月病革訃聞

上爲之震悼賻內庫白金庀喪具孤子念孫奉遺疏進得

旨賜祭葬如制閣臣考諡典以 聞應法 予諡曰文肅

於是念孫件繫公事狀以幽堂之石爲請由敦與公同年舉

進士同館同朝三十有四年熟知公行已立朝志節事業之

素其敢例辭按狀公諱安國字書城號春圃先是蘇州人明

初遷高郵歷世載德潛而未耀有諱開運者治尚書有聲州

學是爲公會王父子諱式耜通五經康熙戊午副榜貢生恬

於仕進教弟子爲人師是爲公王父公之考諱曾祿守家學

爲諸生研精理學教授後進雍正癸卯選拔貢成均母車太

夫人生公時夢得古鼎之瑞三世俱以公貴考 贈光祿大

夫禮部尚書妣 贈一品夫人公復推考妣意以身所得

封典貤贈外父母如其階蓋異數云公生而端重不與羣兒

戲七歲就家塾從贈公受書卽求訓詁大義十歲屬文能自樹立恥爲勦說雷同十九補博士弟子員第一康熙丁酉舉鄉試雍正二年會試第一名

憲皇帝親策於廷讀卷大臣有端人正士之目拔置二甲第二及第授編修此公受知

憲皇帝之始也旋充大清一統志纂修官又兼修八旂志書王子典福建試十一年遷國子監司業十二年充日講起居注官遷翰林侍講奉命提督廣東肇高等處學政

在道陞侍讀學士抵任擢都察院左僉都御史當是時公受知寢深駸駸嚮用矣公之入詞館也嘗語人曰初謁座主高安朱先生先生教之曰學人通籍後惟留得本來面目爲難退而自省面慚發赤由此立志堅定數舉以勵學徒其教國

子也嚴月課抑營競進諸生講濂洛關閩之學不沾沾講義
曰學當識之心見之行事講習討論求其是耳著書垂訓當
出之老師宿儒非學者所急也其任廣東學政也粵東山海
遼遠初分兩學使以寬考校之期公所部自肇慶以西達於
瓊儋皆濱海地文風視南海諸郡縣爲劣公首飭教官以敦
品立操爲多士先接諸生嚴毅有不可犯之色而往復辨論
不啻父兄之於子弟闢學舍爲齋拔士之秀者如千人餽其
中親爲授業有司以非禮挫折諸生者公爲執持不少屈其
有敗羣而害於鄉者繩以重法無所貰由是人知學使之任
以整齊風教扶樹人材爲大地方有司咸知所嚴憚云

皇上御宇元年澄鑒臣工

特命留任四年報滿

召對

晉都察院左副都御史旋擢刑部右侍郎轉刑部左侍郎五

年九月陞左都御史公總率臺綱以激揚爲己任會粵撫以某敎官登薦剡公故吏也知其人昏耄不可用以實聞

上嘉公不避嫌怨

命以原銜管廣東巡撫事公曰吾劾

其人而得其位是古人所譏蹊田奪牛也具摺力辭

上不許乃卽任

陛辭之日

御製五言以寵其行聞有

老親復拜豐貂文綺之

賜粵東文武僚吏皆公所稔悉

聞公至不自安者望風引去公與約宥往咎許自新解絃更張治其輓陂無狀者他皆不問嶺南物產素豐海舶往來貨寶瑰麗風俗侈靡政治疲玩不飭習爲固然公極意整肅墜廢畢舉倉儲溢羨自制府以下月給白粲若干吏以故事白公曰非制也叱勿受比數年有發其事者監司皆坐重辟人益服公操積案塵委公爲之決疑牘省留獄歲久不雨公禱

於神弗應有盜案心疑其誣一訊得實乃大雨計典察吏不
事苛刻嘗曰人才實難且官屢易吏益滋偽易者安知必優
於去者乎莫若勸戒使知自勵故不以糾劾求赫赫名凡三
年而嶺以南十郡三州咸治會丁贈公艱貧不能辦裝制府
請於朝致賻二千金乃得歸舟至南昌內召爲兵部
尙書又遷禮部尙書皆未拜居廬營葬旣訖事十一年服闋
乃入朝視事公故湛深經術嫻習掌故容臺典三禮公所
議必斟酌古今折衷聖籍期於正人心明典制以翊贊休
明之運雖違俗侃侃弗顧也五禮自朝廷達於鄉遂載在會
典卷帙繁重學士大夫莫能徧觀熟講民間吉凶婚姻各以
其俗尙未遵一義是取臣工士民所當循用者爲通禮頒諸
郡邑公長禮部爲刪正繁曲一斷以國朝制度命充

大清會典總裁官會典與通禮相表裏公因得一手編集每
會典進 呈附以通禮悉稟

皇上睿裁改定凡十年而告成十五年充 經筵講官二十

年晉吏部尙書明年兼管工部尙書事銓衡具有成憲精密
無可出入而蠹吏舉疑似者因緣上下其手或瞰人所不知
輒以牟利躁競者爲所愚弄公釐剔衆弊杜絕請謁雖親愛
不敢干以私而部事繁委心力俱瘁病有由來矣公起家寒
素由巡撫入爲尙書衣食器用不改於舊晏居退食矻矻如
老諸生搦秃管點竄丹黃循行書麓參伍鈎索不雜世事門
館閭然中年喪偶不畜侍妾一子甫龀相依同寢起其境爲
人所難堪而公處之自如十餘年如一日與人言謙和若不
勝及臨事持論商榷文義意所不可張目抵几不少避事過

了無芥蒂於胸中以是人皆知公心乎爲國而非好爲崖岸與衆興趣也公清癯骨立疎髯灑然望之嚴氣正性贈公以公年望五未舉子語公曰秋斂春生當養生氣公因自號春圃以志庭訓其篤於踐履如此公所著書自奉勅修通禮會典外嘗欲兼綜朱子師弟問答之語裒其粹精以附章句更取衆說之衷於朱子者嚴爲去取勒成一書而未竟其業公所重固不在此亦以見公志所存耳公生於康熙三十三年閏五月初三日薨於乾隆二十二年正月初八日得年六十有四元配車氏繼配徐氏又繼配徐氏俱先公卒皆誥贈一品夫人子男一念孫女子一字朱元定卽公女弟之子也念孫將於某年某月某日卜葬公於某阡以三夫人附嗚呼典型彫謝感愴何已然卓然爲一代完人終始蒙

恩哀榮兼備班行倚重儻無瑕尤在同譜所當致羨而無遺憾者也爰系以銘銘曰

北斗喉舌天官尊三槐世澤貽後昆珠浮璣社川獻珍唱第曾見五色雲峩峩千尺松蟠囷峭壁獨立無攀援嶺南開府廉石存秩宗三禮和神人十年鉛槧資討論雲臺博士舌可捫上佐

天子下臣民周官法度由睢麟山公啟事得二年介不戾物勇本仁不苟不吐樊仲山拜疏請急宜溫綸騎箕蠹軫悲朝紳楚山鬱鬱淮水淪中有大鳥翔墓門君子有穀詒子孫摘詞無愧鐫貞珉

榮祿大夫吏部侍郎恭定吳公墓誌銘

陸錫熊代于

今皇帝興官耆事董正六典慎詰邦禁圖惟其人時則有若

海豐吳公以持法明允受

上知遇由諸生奮庸汜位常伯折民輸卒壹切倚辦而公亦祇力不懈以迪播彝教

天子嘉其宜毗任簞渥前後居是職者莫與比公旣上章乞身歸會

天子東巡謁見

行在所

詔特以尙書寵公比告薨

於家訃聞

上益愴悼祭葬如制下有司議諡諡曰恭定越明年其孤垣壇等將奉公柩葬於邑東之

賜塋而先期來謁銘初公

之在朝廷予數相見間就與語樂其人溫溫然而垣壇又

先後出予門因稔公事履甚悉迨其歿也會以職事視外制

草得推明

天子所以寵嘉公之意以褒顯其世今辱垣壇之請不可以辭乃按公所自撰次年譜刪掇而銘之曰公諱紹詩字二南其先自遷安徙海豐有以進士起家官山西布政司河東道叅議諱自肅者公祖考也贈刑部侍郎諱象默者公考也代有令聞紹開厥緒公始補博士弟子號高才生會

世宗憲皇帝詔中外舉所知各一人公世父黃梅知縣象寬上公名班見於廷公奏對稱

上旨得試吏刑部授七品小京官改督捕主事再遷江蘇司郎中除知甘肅鞏昌府四歲餘擢西安督糧道爲總督劾免家居久之

上南巡公迎道旁有

詔問公罷官狀公對以實

天子察其誣起貴州糧驛

道再

命按察雲南移甘肅卽

其省進布政使以內憂歸既免喪入覲留爲刑部右侍郎
匝月復拜兵部侍郎巡撫江西召入爲尙書自刑部遷
禮部未上以歲祲奏緩漕事失期挂吏議奪職居京師數月
上終欲嚮用公乃還公刑部一歲中以郎中復爲侍郎而公
子壇官江蘇布政使方用才略顯進
上乃特擢壇刑部右侍郎而遷公吏部父子相代佐司寇摺
紳以爲榮

慈寧萬壽以齒偕廷臣爲九老賜杖遊香山圖形禁中
公年七十餘精決如少壯觀者咸歎羨不可及而公尋以老
疾引年優詔報許且以公諸子官京師去來聽自便蓋
異數也公行內修其於親事生嚴喪死哀篤愛兄弟無間爲
人寬厚長者平常妄言徐視而居官嶄絕有守巖巖然必得

其當出野

天子四十有六年縮職以十數所至輒有聲績在華昌爲興
書院數親臨之以進諸生朴俗以化歲旱發俸蠲買牛種子
民耕秋則大熟在西安修富平渠紬豪石專利者沃漑數百
頃其在雲南甘肅求利害廢置所宜除建甚衆不赫然爲名
而滲人肌膚至深比去乃益思頌之以至持節江西宣

上德意數賑被水百姓劑其羸乏屯租淨額白弛其征視所
安便不苟同異其他設施功利大率類此蓋公於小者無所
不盡意而決疑平法以愼於獄則尤其生平卓卓大者惟天
下亦以此稱之先是公祖少叅卽由刑部郎顯公早從黃梅
君習吏事析律傾服老輩黃梅君知其才以是內舉公及厯
刑部久益精練絕人考定新舊法式具爲規條梳櫛細密可

長用起曹屬迄卿貳謹敏終始如一而諸子更迭爲刑官亦
皆受公教能其職昔周公告蘇公以式敬由獄其後世爲周
司寇聲施至今嗚呼如公者其庶幾近之矣公享年七十八
薨於乾隆四十一年十月十七日配夫人王氏婦道純備先
公一年卒子二長垣王申舉人掌浙江道監察御史兼吏部
文選司事次壇辛巳進士前刑部右侍郎今官江蘇司郎中
出爲公從父中書瑛後孫二之承庚寅舉人中書職銜垣出
之勦國子監生壇出孫女六垣出者一壇出者五曾孫五承
出者四勦出者一婚嫁聘字皆名族銘曰
粹然吳公慶齡前武德孚行聞以御
帝所舉不失親自其躬興練達章式莫之與朋翺翺曹郎遼
建旌節內外隨施挹而不竭蹶也孰起

天子毗之往也孰諸邦刑司之折獄哀鰥其澤世究拜命於廷父前子後

帝眷耆碩恩禮始終謂將百齡何命不融有煒
書告第豐碑螭首以風具位佳城墨食原高水清我作銘詩
用昭厥聲

孝廉于先生墓誌銘

張遠覽

先生姓于氏諱蓋臣字子忠西華下堤人也下堤之于尙勇
健好騎射往往秉節旌爲大帥田園狗馬音樂之盛甲於一
縣而先生獨用儒而貧先生幼讀書敏且勤長而益博在鄉
黨恂恂退謙無賢愚必以貌故內雖岸然自異而人人皆得
與先生親性介而好施嘗數日不舉火自非其子弟門人餽
之弗受也嘗有十金爲盜攫去久不得會縣有公事令與緝

紳畢會令語先生曰盜金者獲矣金具在卽奉金於座先生曰吾人愧貧不能襄公事今聞修縣志願以此助筆札之資令大驚堂下吏相與竊笑曰老人又不欲其家舉火矣初先生於雍正二年舉於鄉至今三十餘年先生之同舉有列官至九卿卽最次亦爲州縣校官而先生竟以窮餓終先生生於康熙某年月日卒於乾隆某年月日年若干配某子凌雲以乾隆二十五年某月甲子葬於某里某原其門人來謁余銘曰先生之遺言也銘曰
內振振焉而遭何薄也吏則必廉信綽綽也於社而祀焉云胡作也

翰林院庶吉士嚴君墓誌銘

杭世駿

君姓嚴氏名璫字十區先世自汴徙臨安遂爲仁和人曾祖

大法祖模皆不仕考儀煌康熙壬午舉於鄉初娶邵孺人生兄在昌繼朱孺人生君三歲而考見背朱孺人教之學生有異稟覆九經如瀉瓶水羈巾爲文動中桂度應縣童子試爲選首已而學使者責君賂不應輒擯不錄雍正甲辰乃用國子生名舉鄉試庚戌成進士改庶吉士旋患瘵應請急歸調疴里門時母夫人屆壽五十方以節孝致綽楔之典築壽萱堂曲盡色養歲餘疾少痊還京明年疾作卒於邸舍年僅三十有一蓋雍正甲寅歲五月朔也同歲生倪侍御國璉周修撰霽梁侍讀詩正爲經紀其含殮奴子兆宗遞其棺以歸時兄在昌方攝江西萬載縣事不得行服母夫人將以歲乙卯之九月四日葬君於北山大方井之祖塋以君少嘗兄事予知君行誼爲悉因命爲誌墓之文君修門內之行居處幽室

必自修整雖家人不見墮容與長老言捧手負劍唯恐不下
然勇於爲義告之急不以亡爲解友人吳嘉丙貧病以死不
克葬君爲悲其窆窆并刊其文傳之薄遊淮陰鍵戶日課經
史爲文一洗懦鈍之習孚甲新意旬鍛月鍊冥收不已至忘
寢饋極意步天嘗疑雍冀齊魯之墟與鶉首大梁降婁元楊
之躔次多有不合著論以發丹元子之疑又謂筆迹之妙關
於人品鮮發明之者集唐史能書人爲一卷他詩文多不存
唯春草碧色賦有能誦之者君生於康熙甲申十月五日娶
吳氏無子以兄在昌子震爲後銘曰

嚴維賢裔令德載光兩雛軒軒一覽一祥五采旣備德輝乃
翔中道折翅爲孤鳳皇方井之陰龍虎回斡幽宮廣輪揆茨
番闕輿藏馬反禮葬非渴誰與刊銘慈母所揭

湖海文傳卷五十五

青浦王

昶德甫輯

吳興

墓誌

大學士

贈太保梁文莊公墓誌銘

杭世駿代

皇帝御宇之二十有八載相國錢塘梁公以疾薨於位

上聞震悼

命皇五子詣靈奠醑晉贈太保諡文莊

予人賢良祠

賜內庫白金千兩治喪公有子遠守遵義

乞內侍養已調戶部郎中道遠尚羈職守

上念旅邸無人

命內務府派員經理其事部察恤典具

奏

諭葬祭如例入祠加祭一壇

令翰林院立傳啟

殯之日復奉

恩旨所過沿途二十里內官弁並赴舟次

弔奠遣人護送哀榮禮備冠絕寮采公起自田間受

兩朝不世之知遇回翔館閣出入禁闥存厯卿宰以至延

登受策

隆恩渥澤古罕倫比而筋力且就衰年運不我

與高厚之

恩待酬於萬一報

國之心積縈於寤寐公

雖死而目猶未瞑也葬有日矣隧道之銘孤子排纘行事先

期來請余與公同備

顧問叅密勿朝夕繼見垂三十載

知公特深其忍不銘按狀公諱詩正字養仲號薌林梁氏系

出新里可考者善菴公積從宋室南渡爲遷杭始祖著籍錢

塘曾祖萬鍾祖國儀隱德不曜皆以公貴

贈光祿大夫

經筵講官太子少師協辦大學士吏部尙書曾祖母汪祖母

施並

贈一品夫人考谿父公諱文瀛歲貢生選授諸暨縣

學訓導不就以公貴累

封如前母凌累

贈至一品夫人

公生有異稟五歲始能言授以四五言詩畧上口卽能誦長

擅文譽與兄啟心有二難之目年三十始舉鄉試又五年成進士時雍正八年庚戌也殿試以一甲第三名及第授職編修旋充一統志纂修官未散館出典山東鄉試爲正考官明年癸丑充會試同考官又明年選入上書房得侍今上皇帝暨誠和兩親王講讀九月充日講起居注官十月晉侍讀明年晉侍講學士凌太夫人病亟乞假遽歸驚聞世宗憲皇帝賓天已擬束裝疾赴

梓宮哭臨先一日而凌太夫人卒上聞

賞藩庫銀五

百兩治喪未期年

詔起入直

南書房

垂問途

次病瘡狀

賜御醫並參藥

諭令以素服入直照現

任學士例給俸兼懋勤殿行走

賜外城第宅一區甫釋

服補授侍讀學士充

日講官起居注仍兼

上書房行走

是冬充順天武鄉試正考官旋晉內閣學士兼禮部侍郎卽
日充經筵講官乾隆四年正月補授刑部右侍郎五月調

戶部兼理錢法五年條奏旗丁事宜蒙俞允十一月轉

左六年谿父公年屆七十恩給二品封典御製五

言律詩御書傳經介祉四字以賜四月奉命

仍兼錢法事務七月扈從木蘭十一月兼吏部右侍郎事是

年充皇清文穎館總裁官七年二月扈從恭謁

泰陵四月充殿試讀卷官旋命闕新進士朝考卷

是年兼御書處行走八年七月

皇上親謁

祖陵駐蹕盛京公與扈從

上升殿大宴蒙恩召赴榻前手賜一卮時與者不過數

人九年六月

賜書清勤堂三字扁額是冬扈從盤山

宮門去內殿稍遠每遇宣喚

恩許乘騎而行重葺翰林

院落成

車駕臨幸

錫宴賦詩賞賚有差公以侍郎

特恩照

尚書品級優賜十年二月扈從謁

東陵五月補授戶部尚書奉

命閱新進士朝考卷七

月扈

駕幸多倫諾爾十有一年九月扈從謁

泰陵詣五臺十有二年六月充續文獻通考館總裁官七月

扈從木蘭十有三年正月扈

駕東巡謁

孔林次祭嶽廟登泰岱

上以山徑險仄

諭公不必隨上沿嶺派侍衛分駐有交

辦事遞傳上下三月奉

命閱會試迴避卷四月調補兵

部尙書又

命閱新進士

朝考卷九月扈從謁

泰陵金酋梗化大學士傅公奉

命經畧羽書旁午一切

臺站事宜資公調撥十有四年金川報捷

特加太子少

師十一月奉

旨暫管吏部尙書事

賜御書宣贊樞

衡四字扁額十二月兼翰林院掌院學士充

日講官起居

注旋

命協辦大學士事十五年正月補授吏部尙書協

辦閣務如故兼教習庶吉士八月扈

駕時巡中洛謁

東西二陵以朱荃事奏對未協罷掌院學士職公經歷四部

遞長六官夙夜在公殫竭心力期盡職而後已其佐司寇也

盡心庶獄精研律例曹司有通曉刑法者虛懷咨詢獄無疑義奇請他比情罪允協暨筦中樞

上以經略與大將軍向無區別

命公釐定章程公博考

前典參酌今制自禡祭啟行以至凱旋告廟條上儀注載入會典及掌銓衡振淹滯抑躁進不徇請託不避嫌謗官方澄敘胥吏斂手在農部最久清釐錢法稽核經費懲各司奏銷之延閣綜直省正耗之盈虛精於心計者不能及也

聖主倚毗旣深任寄尤篤明良一德朝野矚望揆席之端兆於此矣十有六年

六飛南幸谿父公年臻大耄公預請扈

蹕歸省

恩給一品封典

聖駕駐蹕杭州越三日奉

命閱召試諸生卷

御製

七言律詩以

賜並給假一月侍養

御書湖山養福

四大字

賜谿父公台階愛日四大字

賜公天

章下賁焜耀里閭假滿還

朝從

幸木蘭恭逢

皇太后六十萬壽

覃恩頒詔封本身一品明年以谿父

公失明陳情乞養

御製五言律詩寵行有翻祝歸朝晚

卿家慶倍深之句

聖情肫篤不異家人父子家居二年奉

命與長洲沈少

宗伯德潛同纂修西湖志二十有二年

六飛重幸江浙星赴淮陰接

駕

恩賜在家食俸時尚書汪由敦假歸省墓

命公

隨往江甯代攝其事

賜御製七言律詩又

賜萊衣

書永四字扁額奉

命閱兩江士子詩賦卷扈

蹕至金山行在

聖恩體恤

命歸省侍無何遭谿父公之變伯兄亦以毀

卒煢煢在疚獨營幽窆

特詔以工部尚書起用陳情乞

假數月畢葬事明年春就道復調署兵部尚書又奉旨

於紫禁城內騎馬八月充順天鄉試正考官又明年奉

命磨勘會試卷五月閱庶吉士散館卷卽奉

命教習庶

吉士服闋實授兵部尚書十二月

命署掌院事務兼續

文獻通考館總裁官二十有六年二月扈

駕巡幸五臺四月

命磨勘會試中式卷旋充

殿試讀

卷官復

命閱新進士

朝考卷五月補授吏部尚書協

辦大學士仍兼掌院學士事又補充

經筵日講官起居注

是冬恭遇

皇太后七旬大慶敬接

徽號冊寶於

慈寧門奉襄典禮先後奉

懿旨并

上賞資較廷臣有加二十有七年順天鄉試仍爲正考官二十有八年六月拜東閣大學士之命仍兼吏部尚書翰

林院掌院學士事九月

賜內城第宅一區十月晉加太

子太傅十一月以微疾遽薨遺疏不及上公天性孝友太夫人前逝諱辰及歲時饗祀輒嗚嗚作孺子泣侍谿父公色養倍至事伯兄飲食必偕弗敢先也弱弟爲谿父公晚年所舉子愛念尤篤俸餘贍給之外分財產與子姪並三族之待以

與夾者不能悉數也自入仕以至爰立不傍門戶不矜巧捷
樸誠自矢獨結

主知讒公者莫能入愛公者亦莫能助也薦剌人才封章慎
密倖進之徒未由關說左右親近無從窺伺焉總裁各館鉅
細皆經手定去取精當詳要適職巨製鴻裁折服羣彥文章
訓詞深厚辦香南豐詩骨蒼秀廣利 明廷韶英繼響王

石均調遠播 皇風仰合

聖製爲朱元以來侍從之臣所不及臨池初學誠懸繼泰文

趙晚師顏李格凡三變奉 命編校秘殿珠林石渠寶笈

二書益得縱觀 天府收儲詣力精專天情流美經進時

獨蒙

膺賞屢勒堅珉同列推爲第一公生康熙丁丑二月四日薨

於乾隆癸未十一月十有四日壽六十有七初娶子孫繼以包累贈一品夫人再繼以徐以子官得贈如前公子二

長同書乾隆十七年

恩賜進士

日講官起居注翰林

院侍講以從伯兄次敦書乾隆十二年舉人

恩賜一品

廕生貴州遵義府知府子女子二長適舉人廣東清遠縣知

縣范同治次適太學生吳炎兩子一女皆包夫人出一女徐

夫人出孫男三長玉繩仁和縣學附生次履繩次應繩孫女

一今以三十二年二月癸丑葬於邑南之象山三夫人祔焉

銘曰

梁祖伯益以國爲氏公侯子孫必復其始顯允梁公早宅

帝衷甘盤舊學四輔道隆發聞詞垣遍歷華省四長六官文

柄屢秉

天子幾暇典學不懈公爲益稷賡歌颺拜

萬乘巡遊雅雅魚魚公爲臯朔常在屬車南浮江淮東登嵩
泰瞻洛觀河經覽九塞公和其聲金舂土應每奏一篇輒動
清聽筆跡淵妙鳳泊鸞停琬琰深刻照耀 闕庭公佐
唐虞以道自許爲世舟梁爲 國風雨出入綸扉從容丹地
朝夕論思不我遐棄公乘白雲仿徨九閭景短心長恐孤
國恩丹忱縷縷沒而猶視我知公深銘告惇史
通奉大夫都察院左副都御史雷公墓誌銘

彭啟豐

公諱鉉字貫一一字翠庭雷氏世系出馮翊自唐遷閩之寧
化曾祖某祖某父某諸生三世俱以公貴 贈通政使司通
政使公年十七補諸生雍正元年舉於鄉以合河孫文定公

薦官國子監學正十一年登進士第改庶吉士請急歸

今上卽位旋

召直

上書房元年授編修三年充

日講起居注官四年遷左諭德以父憂去官九年 召仍直

上書房十年累遷至通政使十四年以母疾乞假歸踰年入

朝

特命督學浙江尋改江南十七年遷左副都御史仍

留督學其冬復任浙江二十一年任滿以母老乞終養得

旨卽自浙侍母歸二十四年丁母憂勞毀得疾其明年冬十

月某日終於家公之卒也予旣爲文以哭之越一年冬其子

定淳寓書并狀來乞銘予與公同官翰林素知公旣督學浙

江又與公先後相代以是益悉公爲人而歎公之志益未竟

也公之學之醇守之固其立朝抗直遇事一無所撓屈其遭

際亦隆而卒未竟其志者豈非命哉方

上御極之初銳意至理在朝諸臣爭自奮思所以稱盛意
公時官諭德每進經史講義必詳晰義利開設端委以推極
於治要

上嘉納焉有同官以喪歸未葬入臨皇太子喪

上意欲留之公力疏爭事遂寢當是時也朝野無事

天子方虛已側席有一善無不庸若谷之應響公駸駸方向
用而適以憂去既服闋入朝會日食求言上書論臺諫以

爲朝廷樂聞讜言不必疑其好名臺諫之所得者名政
事之所收者實也督學浙江浙西饑無入告者公輒以

聞遂得

旨賑貸公旣感

上知不欲以虛文答

詔旨亦不肯以職分自諉謝惟

上鑒其誠而信之旣用其言復顯其身且使得就官迎養所

以曲成之者無不至夫亦將有待矣而公復以乞養去蓋嘗
論人其器大其意必遠以公之精誠磊落抗節不回且無有
遏塞之者宜不獨此三數事見諸言論蓋已舉其大者矣然
則使公敷歷至今其位益顯其任益重而亦無有遏塞之者
將必更舉其大者以剗切一世而惜乎其志卒未竟也公少
學於蔡文勤公其學一宗朱子不搖於他說臨卒無一語及
私其遺疏云爲子之事粗具爲臣之志未伸蓋公亦自以未
竟其用而天奪之年爲可憾也公配巫夫人子男子三長定
淳舉人次定樹國子監生先卒次定源子女子一適國子監
生巫國維孫男子二女子二以某年月日葬公某所銘曰
器之大小隨所儲瓶甗甗石殊盈虛我我雷公志不渝英辨
挺特精誠字守以醇古浩氣俱落落數事昭寰區蘊負更與

常人殊厄之歲月未盡舒銘茲景烈垂史書子孫達者其嗣諸

原任禮部侍郎齊公墓誌銘

袁枚

乾隆元年秋余與齊公次風同試博學宏詞於保和殿一時士論僉以實學推公及榜發欽取十五人公果與選余雖報罷而公念同徵之誼最殷後三年余亦入翰林作後進常與公唱和外出爲令始與公別別四十七年余老矣遊天台山公死已久且葬其兄周南弟世南年八十餘龐眉扶杖延予飲其家抱公詩文集百卷出曰先生視此以志其墓嗚呼當時薦此科者海內凡二百餘人而今則在野在朝屈指無有也公之遭逢寵遇升沉禍福非余後死其誰知之而誰表之謹按公名召南字次風又號息園幼而穎敏讀書十

行俱下年十六受知於督學何公世堪充博士弟子貢入京
師中已酉副榜雍正十一年督臣程公元章以鴻博薦授翰
林院庶吉士改檢討 御試高等超遷至侍講學士加
日講起居注官充戊辰會試同考官 上書房行走再遷
內閣學士禮部右侍郎公清癯短身而朋鄉樸之氣溢于眉
宇獨能宏搜博覽記性過人

上於寧古塔得古鏡未詳款式問朝臣莫有對者公引證書
史羅縷具奏

上大悅顧左右曰是不愧博學宏詞矣 國家疆域恢宏烏
喇巴哈俱置候尉又新開伊犁諸臣奉使者輒先詣齊侍郎
家問路公與一冊某候某驛應宿何所需若干糧數萬里外
若掌上螺紋毫忽無訛或問曾出塞乎曰未也然則何由知

之曰不過漢書地理志熟耳問之讀漢書者卒亦不解沈尙
書德潛常在

上前譽天台石梁之奇

上問公公曰荒山磽磽不足以勞

聖駕人笑其奏對率易而

上以此益重之十四年四月從

上書房歸澄懷園日昃

馬驚觸大石上腦涔涔流昏憤不起

上命蒙古醫速治醫到生牛腹剖公其中又取牛腦乘熱納

公額左右搖公始蘇當是時

上方嚮用公遣皇子及中使問病者不絕於道又數月公

病少痊步猶蹢躅頗忘所記書不能握筆又心念老母乞回

籍終養

上慰留再四然後許之還浙後主戴山萬松兩書院

上三次南巡公力疾迎

駕皆

召見

賞賜優渥先是公有族匪周華者素不

良公訓誨不悛遁海外三十餘年忽因浙撫熊鵬巡城避

道獻所著逆書揭公十大罪能奏

聞

上誅周華赦公削職歸里公身受

上特達之知方恨無涓涯報而怪民妖言乃出自近族悔平

時教勅無素又隱忍不先舉發以致惡彰於天自分雖九死

罪固當而

上復屈法活之恩逾重愧憤愈深結轡不已路上疾暴作還

家匝月竟以不起年六十六嘗言臈道元水經注明於西北

閩于東南特撰水道提綱二十卷又歷代帝王表十三卷後

漢公卿表一卷所修官書則一統志明史綱目續文獻通考
禮記漢書考證皆所纂也曾祖三仲祖化龍父鼎俱以公貴
贈如公官妻張氏封二品夫人子式遷國學生女二人葬
台州花坑之原銘曰

天台之山其高萬有八千以是鍾靈生公其間學識其大才
擅其全以人視山幾與齊肩雖梟獍噬其後惡馬蹶于前而
終以受知於

天無損其賢嗚呼非我來遊誰表此阡嗣後川湜湜峯綿綿
磅礴鬱積繼公而生者其又在何年

迺西兵備道唐公墓誌銘

呂星垣

乾隆五十五年歲庚戌觀察唐公年七十有九考終于家公
子仁埴狀公行事萬六千餘言寄其友呂星垣請銘墓星垣

讀而敬之謝弗敏旣而仁埴躬叩星垣吳縣學官舍再拜請
乃不敢辭按狀公諱展衡字南屏先世由海甯遷江都世有
科第勲績家素封曾祖之天前明廣東靈山縣知縣當明季
高黃爭鎮獨捐金贖被俘者家遂落祖詩逸民高節從祀鄉
賢考綏祖康熙丁酉舉人起家封邱令終湖廣總督妣吳太
夫人公始以蔭讓其弟秉衡後弟倚衡以充州府知府
召見

上詢及公蒙 特恩以通判發雲南補彌渡通判歷署思茅
同知大理府普洱府元江府知府授普洱府知府擢迤西道
自劾落職再授普洱府知府擢迤西道以病乞歸配劉恭人
子二侍陞蔭生河南彰衛懷道仁埴乾隆丁未進士浙江仁
和縣知縣孫四鉅鑾鑾嶧保葬邑某鄉某阡公在滇十八年

屢治兵督餉熟練緬甸各猛山川險利鹽竈礦砂情形封疆大吏倚如左右手

上亦知公深顧苗夷叛服不常極撫馭方略始向化公觀察迤西方錄囚至臨安有襲宣慰土司刁維屏以族遁公馳追過九龍江至猛籠弗及遂自効奉 旨革職留効旣維屏

自歸公復積功復原官究弗象賢厥考以此當 國家用兵

緬甸公之功多而緬甸精兵亦與孟艮召散相終始初孟艮酋死其庶子召散逐嫡子召丙據孟艮召丙偕其臣以先捧來奔召散犯邊不已 朝廷將發兵督臣先至普規畫方略公守普請分陽武壩至通關十站計里給夫馬值禁長夫制滾運迨孟艮降民不苦之時緬甸阿瓦酋憎毒勢吞併木梭接些木邦新街煽結孟艮內地隴川猛莽各境騷動又提督

李時升輕進失律遐邇震驚公亟請以叅將哈國興提兵馳至軍收時升以兵授國興揮使力戰大破賊國興遂知名公遂持重按兵待 朝命於是丁亥四月明公瑞以定邊將軍出統兵用降人召丙以先捧嚮導召散聞益發兵助緬明公乃檄公兼守元江公行召散攻猛彝普洱甚急公輕騎沿途募練復揚言遣以先捧率大猛養巡襲孟艮公乃揚麾入普賊震兵威驚後襲遂逃明公奇之請超擢太守公遂閱普藤至九龍江數百里兵火墟落招徠撫綏量土宜給籽種以集流亡召散猜復結召功犯猛籠自攻三臺山公立遣猛遮敗召功猛海敗召散召散退復謀內犯明公乃使總兵官佟國英七十一駐猛角猛養爲犄角明公乃從普發兵檄公閱伍辦裝治仗公晝夜盡瘁明公歎重明公遂以輕兵由新街進

攻錫箔一鼓下之過天生橋一日十三戰皆捷破十八壘直抵朱塞阿瓦行滅矣明公遽染瘴糧竭還猛育莖于軍大兵初還將軍道沒邊圉驚公渴方略鎮定而候者輒報賊竊發公遂以己丑正月偕兩總兵出兵打樂遇賊日三戰皆捷賊退繕守固是年三月傅公恒以經略大將軍至永昌督師以普洱獨當西南面乃移軍需局永昌設軍門行臺普洱委公總理傅公持重先招懷旁近時安南國王黃公纘爲下黎維禧逐率四百人款寨公啟經略納之安插思茅州那可樂地撥給籽種牛具遂招撫南掌國王王弟召翁耆舊聘纘女媽鼎未婚公請以媽鼎歸之南掌臣附請貢公更以經略檄緝緝諸國體書馳布遠近皆恭順無助阿瓦孟良者是年冬經略出師由猛拱木邦以往皆望風款附遂往據阿瓦上游老

官屯阿瓦震慄始降奉

詔班師留副將軍阿公桂善後

公治凱旋竣陳阿公善後四事一安設屯練請九龍江外北
至整蘭南至打樂攸古寓兵于農卽各猛選練進充伍退歸
農二撫恤流民請車里外區田築舍照常平社倉建倉散給
各猛春放秋還俾力開墾三增積米普洱兵儲例支二年倉
猝運餉糜帑請撥五年四徙降人軍興用以嚮導而苗性桀
黠各猛厭苦不徙并患煽搆請徙內地飭各猛就近管轄阿
公次第條上行之故迤西一路戰守有資耕鑿復業公審知
九龍江內十三猛江外八猛界錯緬甸中復有野夷一種出
沒剽掠無常捷如風鼠而各猛習野鬪不嫻步伐其器械惟
標鎗短刀往往爲野夷困公訓練弓矢火器步騎咸習爲設
瞭樓置候馬埋伏弩野夷逃邊微霽公自劾復起卽招降革

裏雁部曲於猛籠又遣吏目盧驥招降整欠酋召教又馳按
普籐酋阿別刀二焚剽巨案皆軍書旁午出別才赴他屬奏
功其理永昌軍需分緬案尾案爲一百八十一事核準銷九
百二十四萬六千八百餘兩其核減者分全賠分賠獨賠豁
免四項皆報可三守普洱民尤懷之公初理湯丹銅廠爲滇
銅廠第一墮欠久懸公特愼客木支放嚴辨礦色一時客長
爐戶竈丁皆勤儉墮額不缺及理威遠鹽井一力培養商竈
私靖官行商民利便相度普洱城南海子河爲疏通之由清
水驛入金江灌田數萬頃又登西山望草海見秋水獨盛慨
然曰是可漑而耕也爲鑿河廣五丈深丈建閘下游時啟閉
數十里成沃壤是年植麥越歲植禾其精理財如此顧在普
議開白馬山銀礦上下歆動公力止之謂聚數萬失業人鑿

山無礦則散之甚難尤有定識蓋少侍總督公習吏事其精神亦副之前後 召見

上備問家世及軍政欲大用公公以驚疾歸

上惜之公訓子甚嚴嘗就仁垣養至嶧縣仁垣每趨庭公曰事竣乎曰竣始命坐有投到未識者輒舉蹙曰汝惰一刻民累一日有命案必曰忤作不可信也必親閱寓訓侍陞曰黃河挾沙行病在沙治在水法宜激之怒直暢其勢曲殺其威母怠工也而不可迫母爭土也而不可讓治上游察下游吃重防北岸顧南岸當衝皆名言尤愛惜人才訪敬奇士貌清癯而性溫和及臨大事決大疑一言立解蓋綜核行狀約誌其平生若此銘曰

惟孝謹宣勤能事迺壯哉馮唐魏尙其克勝哉東西南之甲

仗兮解組綬于行勝怡就養兮訓于吾曾雖未使相厥惟股肱千載慕訪寔銘是徵

宗人府主事孫君墓志銘

邵齊肅

君諱夢遼字中伯姓孫氏江蘇昭文人世居邑東偏鹿阿鎮遂爲著姓祖麗公四川什邡縣知縣父爵昌太學生並贈奉直大夫君性尙疎簡氣度明豁吃於言辭偉於形貌不矯飾以取名不苟同以徇物剛毅木訥體近仁之姿直諒多聞標益友之目年始舞勺能爲文詞遂絕意嬉遊究心篇翰有核羣籍軌涂先正十九歲補縣學生三十歲遊京師中雍正十三年順天副榜

今上乾隆元年補宗學右翼教習太常卿同邑陶公正靖經術史才儀型後進君升堂承訓辨析源流器識日充文體彌

上於時四方英俊以鴻詞被徵及異等充貢者雲集輦下咸聞聲景附氣類相求君遊道日廣華譽翕習矜標格以相許恥干謁以自媒故以名傾青槐之市迹絕霜戟之門三年中順天鄉舉七年成進士不樂簿書遂棄銅墨改秩教授待次家居迺更謝遣聲華屏絕人事研精爰繫別事筌蹄以爲易蘊至深然理藉詞顯而諸家穿鑿或離析任意或附會承訛縱有新意殊非本指於是脫棄九師精求十翼務使考辭必順繹理皆從撰讀翼揆方凡十卷十六年 翠華南幸吳越今江蘇巡撫太子少保番禺莊公有恭昔與君共事宗學有尹班之契時以戶部侍郎督學三吳薦君詞賦蒙 恩召試行在卽授中書舍人十八年在軍機處行走喉舌要津鈞衡重地幹略之上是所爭趨君處之以樸誠將之以悃悃

允洽物情莫能疑忌

駕幸熱河木蘭

東陵南苑累扈

清蹕勤慎著稱尋除宗人府主事以祖

母喪去官服滿赴京師屬

王師新平準夷有

詔撰集

方略大學士諸城劉公統勲以軍機處舊人屬以編纂君恪

慎載筆昕夕不怠自非職事未嘗私謁二十七年復補原官

遇

覃恩誥授奉直大夫宗人府主事加一級君素懷磊

落拙於治生宦遊減產有北門終窶之歎塵常生甑口不名

錢竟以憂傷損和成疾以二十八年三月五日卒官春秋五

十有八嗚呼哀哉君本以母老將辭歸養征期已戒大命俄

迫遺令二子秘已喪問勿使太夫人知之嗚呼悲矣時湖南

按察使同邑嚴公有禧在京實經紀君喪醫藥殯殮泊乎反

葬多出其力君凡再娶元配錢氏佐君食貧辛勤黽勉娶三

歲而卒

贈宜人繼配嚴氏卽按察公之姑太僕少卿虞惇

季女

封宜人人生三子二女長子資祖次子復祖太學生幼

子培祖生十年隨喪南還將至道天卽以其年十二月十二

日其孤以君之喪與錢宜人合祔宅東先塋之次乞余誌其

幽宮嗟夫余與君交歲踰二紀遷舉比牒之舊秦晉牽連之

戚性情疎放之同文章旨趣之合風期篤密有踰等倫出處

後先互成睽阻豈料奄值殲良長乖執手秣陵之書無因遠

答山陽之夢空期動輪潛然攬筆敢辭蕪淺乃爲銘曰

鹿阿濱海孫宗居再世蘊文君擴諸名甄甲科踐天衢不樂

銅墨歸著書疏明彖繫闢榛蕪得三聖意遺羣儒

乘輿

南巡蒐瑾瑜鳳池鸞閣影華裾逝將養母還故廬沉瘵忽侵

悲隙駒平生口吃勇有餘行不詭隨言不諛根本肫固節目

疎交賢友直滿八區要津高門絕趲起任寶去浮君子徒我
誌其埏涕漣如嗟哉斯人今則無刻詞紀實閭泉塗茫茫千
年名不渝

陳少章先生墓誌銘

王峻

吾吳昔多博聞好古砥節勵行之碩儒本朝百年來位不
大而名最著者則有義門何先生何先生及門無慮數百人
其最相契如晦翁之於蔡季通呼爲老友者是爲少章陳先
生何先生歿後先生獨以名德見推爲中吳文獻之重輕者
幾二十年乾隆十二年十月十三日以疾卒於家典型凋謝
遠近爲之嗟歎卜葬有日故人門弟子咸謂先生有道而文
宜按古私諡之義諡曰文道先生其孤具狀徵銘於余按狀
先生諱景雲少章其字先世家常熟代有聞人所謂河東陳

氏也自曾大父天麟始遷郡城大父明義喜藏書深禪理多
與明季遺民故老游父治昌慷慨尙義拯人之急母朱氏孺
人先生生而穎異初就塾時同塾諸兒所課皆能背誦年十
七睢州湯文正公撫吳試士拔置第一十九從義門先生游
益講求通儒之學窮究經史晝夜無間學遂大殖父喪服闋
補吳江縣學生康熙癸酉試京兆不售而歸再至京館藩邸
三年復辭歸時年甫四十以母老遂絕意宦遊後藩邸再遣
使敦促漕帥赫公命淮安守造廬延請皆堅謝不赴此先生
出處不苟之大略也其爲學如飢渴之於飲食終日丹鉛不
離手凡經史四部書從源及委貫串井然地理制度考據尤
詳下及稗官說家無不綜覽而尤深於史學皁歲溫公通鑑
略能成誦前明三百年事談之更僕不倦若身列其間能剖

決其豪芒得失爲文章簡嚴有法所著有讀書紀聞十二卷
綱目辨誤四卷兩漢訂誤五卷國志校誤三卷韓文校誤三
卷柳文校誤三卷文選校正三卷通鑑胡注正誤二卷紀元
考略二卷文集四卷皆能有功前哲嘉惠後來其他少時帖
括之文及應聘所修通志等書非先生所留意故不復紀也
性孝友居父母憂每勵輒絕歲時祭享必涕泗沾衣與人交
有始終外和內剛不因人熱所居老屋數楹朝饘暮鹽人不
能堪處之怡然晚歲名益高迹益晦終年杜門足不踏塵市
蓋先生視世絕少可語世亦鮮知之者所謂不食之碩果讀
書之種子豈與世之士輩悅營華廬者爭一時之得失哉享
年七十有八配吳孺人先卒子男二昇長洲縣學生黃中吳
縣學生入國子監女一歸國子生張爾模孫男四慶曾文雍

文寬慶餘以是年十二月某日葬於吳山北麓之新阡奉吳
孺人耐黃中爲人耿介博學有文爲先生克家子以余不能
取容當世顧獨重焉余雖不獲親炙先生然與其子交深且
久遂不敢以不文辭銘曰

惟道與文立德立言於時不偶於古獨肩彼富貴者磨滅忽
焉先生有書後世永傳吳山之麓鬱鬱新阡我銘幽宮徵在
萬年

惠定字先生墓誌銘

陳黃中

本朝吳中氏族以經義名家世取科第者無慮十數家其繼
世科之後獨抱遺經遠承絕學則有吾友松崖惠君益其學
醇行粹所傳者遠所積者厚其實大聲宏非苟也君諱棟字
定宇松崖其自號也先世扶風人後從建炎南渡居湖州明

嘉靖中又遷於吳曾祖有聲始以經學教授與同里徐枋以節義相尙祖周惕父士奇仍世入詞館有大名世所謂老少紅豆先生者也君世家學弱冠補弟子員卽遍通諸經於漢唐說經諸家熟洽貫弗而易學尤邃所著周易述一書專宗漢說厯三十年四五易稿猶未卒業其專心孤詣類如此少紅豆前以修城毀家君遷居城南閉門讀易聲徹戶外其世交多躋膺仕義不一通書問惟以授徒自給而已兩淮盧運使館之官舍居三年後以疾辭歸丁丑除夕病中以書抵余拳拳論學術人才之升降其識趣高邁又雅不欲僅以經師自命也夏侯勝有云經術明取青紫如拾芥今觀於君其於經術明耶否耶乃所遇若是使易其窮經之力習場屋臭腐語數千言固宜早取上第去乃舍彼取此爲舉世不爲之學

晚歲一應公車徵且以爲幾得售矣又未及抵都輒報罷終身學漢人之學會不得一遭漢儒之遇而處之固然耿耿自信不爲窮達所移斯可謂篤信善道之君子已然君晚歲遇雖益蹇名益高四方士大夫過吳門者咸以不識君爲恥人亦以小紅豆稱之其所以紹門風者蓋不以爵而以德也君爲人通不隨波介不絕俗爲學廣博無涯浹於經史多所論著有九經古義二十卷周易本義辨證五卷易漢學七卷古文尙書考二卷左傳補注四卷明堂大道錄八卷補說一卷後漢書補注十五卷續漢制考一卷其他如王尙書精華錄訓纂注鈍翁說鈴注乃少時所著也君以乾隆二十三年五月十二日卒年六十二娶張氏有婦行子五人承學承德先卒承附後君半歲卒承緒承萼孫一廷鳳君卒之明年三月

某日其孤將葬君於某所以余知君深涕泣來請銘義不敢
辭銘曰

羣經賴漢僅得存陋儒訓詁增紛紛經義經術殊途分太清
點綴翳浮雲拾藩剽竊夫已村談易理障尤蒙昏輔嗣以降
一律論惟小紅豆漢學尊九師廢易嗤河汾卓爾大雅信不
羣貫通象數迫三墳皜然不爲俗學醺獨尋墜緒韋編溫荆
榛鹵莽勤芟耘下帷著述輕元纁江公拘曲徒狃狃道書傳
後名彌芬有求芳躅視斯文

湖海文傳卷五十五

湖海文傳卷五十六

青浦王 昶德甫輯

墓誌

給四品銜翰林院侍讀楊君墓誌銘

劉 綸

乾隆三十二年丁亥閏七月二十一日翰林院侍讀充通鑑
輯覽館纂修官楊君卒於位於是領總裁事大學士公傅恒
以聞且言輯覽一書悉稟 睿裁釐定非儒臣等能裨
補萬一惟楊述曾在事八載實殫心力今書垂成而身故不
獲邀序微勞情殊可憫得 旨楊述曾著賞給四品職銜
同時館閣諸臣罔不摧感銜激惜君不克生被其榮而益信
君之克世其業舉其官也越歲己丑將卜葬其孤仁譽苴杖
請銘不得謝按狀君姓楊氏諱述曾字二思企山其號先世

自漢太尉公震四十八傳至士英始由江西遷江南武進縣
之前黃里後其地分隸陽湖遂爲陽湖縣人又十三世至故
明崇正癸未一甲一名進士翰林院修撰諱廷鑑君曾大父
也皇朝康熙己未進士提督順天學政左春坊左諭德諱大
鶴君大父也康熙乙未會試中式戊戌 殿試進士翰林院
侍講學士諱椿君父也君爲學士公長子旣夙慧稟家學生
九齡五經已成誦比長綜覈羣籍於史學尤精心貫串甚博
而知要初侍學士公在史局時方編纂明史綱目三編君叅
預屬草禮部侍郎桐城方公苞見之捉其臂曰史才史才聲
譽大起雍正乙卯中順天鄉試舉人乾隆丙辰 詔舉博
學宏詞科戶部侍郎長沙陳公樹萱以君名特薦丁巳以
國史館議敘候選知縣壬戌會試中式 廷對時

今上皇帝以策問耗羨抒論獨爲委備 特擢一甲二名

進士授職編修工部 御試新舊諸臣君名在一等第三

晉官侍讀戊寅再應 御試適君遇足疾左遷編修癸未

復晉右春坊右中允甲申再晉侍讀丙戌充 日講起居注

官及丁亥秋館中進 御批輯覽定本一百二十卷繕稿

將脫而君病則已劇矣君在翰林屢司文枋分校順天鄉試

者一會試者二主考雲南廣東鄉試者一陝西鄉試者二分

教習庶吉士者五得士如戶部侍郎錢塘王公際華已下咸

躋通顯所上經史發明傳注具有家法其釋書大陸旣作因

陳畿輔水利論漢書魏相傳因條救荒之策及治淮黃東濬

之法大指謂黃河兩岸之壩宜塞南岸而開北岸則漲流可

消民居可捍人以覘其實用君之爲纂修也館臣各以時代

分年編纂而折衷體例書法本末條件總裁一委之於君又古今輿地之承譌襲謬紛歧莫定者博徵詳訂彙爲箋釋乃至牆牖屏帳悉著紙筆一燈徹曙自言樂不知疲而久坐脾損下泄浸以日增嗚呼翰林號稱史官用文章爲職業若楊氏世踐清華人嫻述作觀學士公之於三編與君之於輯覽則直以其官與身視成書爲始終其可誌也夫君平生孝友天至事學士公暨母沈太淑人能先意承顏前後執喪盡哀盡慎侍仲弟福建臺灣縣丞耀曾季弟山東道監察御史承曾以學行相敦勗會季弟以同縣湖南巡撫蔣公炳緣事有連被遣歸道卒君傾貲調護慘割幾不自勝又從弟和官戶部筆誤公力復之生計迫嗇而戚黨寓食邸舍者屏當供具無勸容與人交不爲姁姁暱比而通懷接物後進往往樂就

之所著有南圃文稿二十卷君生於康熙戊寅九月二十八日距其歿也得年七十初娶錢氏繼曹氏竝以世家女嫻婦職先後誥封宜人皆先君卒錢宜人生于仁元亦先卒嗣仁譽國學生仲弟耀曾出也孫一慈慶孫女三銘曰宏農系前黃貴四世翰林兩及第一脉家傳汗青字武交綏文絕韋以死勤事義莫暌吁嗟楊君洵禕而

都察院左都御史竇公墓誌銘

秦瀛

乾隆六十年諸城竇公以磨勘事罷左都御史任居京師以病卒明年爲嘉慶元年其孤汝翼等歸公之喪將以某月某日葬公於諸城某山之原汝翼先期郵公狀寓書於杭屬銘公之墓瀛辱公知最深不敢辭公諱光鼐字元調號東臯曾祖某祖某父詵乾隆甲子舉人皆以公贈榮祿大夫禮部

右侍郎曾祖妣臧氏李氏祖妣牛氏沈氏妣張氏皆 贈一品夫人公幼負絕人之資家貧貸書於人覽卽成誦一日讀文選卽操筆爲琅邪臺賦監司某公見而大稱賞之時公年甫十二耳十五補博士弟子員旋中丙辰本省鄉試副榜辛酉舉順天鄉試壬戌會試中式入翰林爲庶吉士散館授編修戊辰 御試翰林詹事府等官於 乾清宮閱卷者列公四等向例大考惟高等得遷官後等改官降黜有差上知公特遷公爲右中允蓋公被

上知遇自此始未幾累遷至翰林院侍讀學士 御試一等特遷內閣學士出爲河南學政丁內憂歸服除補都察院左副都御史視學浙江任滿還以與刑部爭秋讞事更議錦級

上許留任如故又奉

命以對品用遣祭告南海所至却

地方賂遺尋

命署內閣學士越二年授順天府府尹畿

輔叢弊久吏胥多因緣爲奸公受事苞苴屏絕懲其尤數人

劾州縣之不職者二三人時京縣爲蘭公第錫李公湖皆經

公薦舉其後官督撫皆號稱賢臣任京兆四年丁外憂歸服

除再補原官蝗蝻災公報聞親捕之因旗莊不出丁協捕與

督臣奏辦覲職不數月

上又起公爲通政司副使遷宗人府府丞公爲府丞最久凡

十年復視學浙江特擢公爲吏部右侍郎會

上遣大臣清查浙江州縣倉庫並有旨問公公以實告

且以平陽令黃梅科斂病民條其狀以上論者誣公幾不測

公復侃侃奏論

上卒直公按治黃梅而還公官復授宗人府府丞擢禮部侍郎又出爲浙江學政越三年以左都御史召還在上

書房總師傳上行走益

上稔公老成冀以學問資輔導公在禁近

上製文字輒命公閱公撰文以進必因事納忠無壘言

乾隆六十年充會試正總裁以所錄首卷多語疵被勘議落職僅降四品銜予休而公於是亦旣老且病矣公生平不講學而仁誼道德之旨不言躬行尤嚴析義利而要之以毋自欺立朝五十年揭揭然柴立無所顧慕剛直不能容人人多咀而忌之者惟以誠惻荷

聖主知屢起屢仆卒蒙保全而究亦未竟其施嘗言學貴有用如昌黎折王庭湊陽明平宸濠乃眞學問故公於書無不

闕而不屑沾沾於章句訓詁世之人僅以文章稱公未爲知公者也然卽公文章亦足見公學之有本蓋公詩似少陵古文如昌黎制義則發揮聖賢義理自成一家之文云公得士最盛公之門厯官中外位公卿者甚衆乾隆己亥有浙江巡撫某朝京師某故貪墨吏而其鄉試出公門與公遇于直房公以言規之某怫然時公之亡謁公而厚致饋遺公揮其金絕不與通無何某果敗公性開蕩遇同列下輩樂善汎愛言無所不罄每與客談客起猶立語移晷刺刺不能休瀛侍公稍晚而公於瀛尤厚公亡蓋知我者鮮矣公處已約敝纁惡粟如窮諸生歲入瘠田以贍貧宗人有所請不吝此皆細行不足重惟公生平大節雖公所未嘗告人與人所不及知者不能具書而按公之狀貌以瀛之所嘗聞於公者略爲詮次

已足以想見公之爲人公初娶張氏繼劉氏俱贈一品夫人子六長卽汝翼乾隆戊戌進士宗人府主事汝瑄汝璜汝咸皆國學生張出汝翀劉出汝翮側出女四人嫁娶皆名族孫十一人孫女十二人公之生以康熙五十九年十月初二日卒以乾隆六十年九月二十二日年七十有六著有東臯詩文集應制集省吾齋稿銘曰

維執不娶逕懷所讐飛謀釣誘弗改其輶厥施未究曷云其休其學則昌祛阮豁脊包羅旁魄躡韓軼歐公實知我以銘公幽

翰林院編修邵公墓誌銘

鄭虎文

今海內人士所推能爲東京六朝初唐之文者無論識與不識首稱吾友叔山叔山與同歲舉進士名能爲史漢若昌黎

河東文者則有定興王君芥子芥子初亦好爲文如叔山及見叔山文歎爲夫授遂暇不復作二君同年齒同官翰林同以文學相引重而又同以原官放歸田未幾芥子復起累遷至湖南觀察行大用而叔山則竟死矣觀察嘗遺書索刻其文將序以觀示後學叔山未及應卒明年其孤培愿走使乞觀察銘其藏觀察曰序吾已生許之矣銘請他屬培愿則又泣而請予文予與叔山交不後觀察乃序而銘之君姓邵氏名齊燾字荀慈叔山其號也先世在唐貞觀間居杭之北市曰道宗無子以弟吏部侍郎說子好禮爲後凡十有三傳由杭而睦而歙至饒州都帥顏子萬成乃卜居休甯之黎陽又二十傳至鄉飲賓嘉祚始遷常熟後分縣爲昭文遂著籍爲昭文人嘉祚生君曾祖歲貢生可佳 贈儒林郎可佳生君

祖附貢生甲臨甲臨生君考候補主事韞並 贈奉政大夫
兵部武選司員外郎君考少孤能強毅自立遊義門何學士
門受其學尤善書得三王法生五子君其第二子也生之夕
君考夢明祭酒馮公夢禎以名刺來謁聞若願借居三十六
年云寤而君生因名君小名曰開生三歲生母曹安人卒嫡
母程太宜人撫之愛如出腹子甫受書輒了大義塾師驚辭
不能師長而愈驚有聞於時其學於古也涵而揉之去故遺
跡咀含浸淫滲漉衍溢乃大昌於辭而惟自其已出今古駢
散殊體詭製道通爲一涉筆矢音金玉咳唾造次以之允蹈
維則班范潘陸斯文未墜君於 本朝一人而已乾隆壬戌
第進士其闈中文騰輦下人皆口傳以熟後有效者輒得弋
獲雖形貌乖舛羣相指爲邵體君聞之不爲忤也君旣入詞

館明年

鵠幸翰林院錫宴彷彿梁聯句與焉尋獻

東巡頌原道敷章研神播采揚班之亞也羣公器之爭欲致
君門下顧君冲澹不省揣合相滄滄爲暱又習與一二靜者
遊益耽閒喜自弛置時多年少暴起意氣盛各以才力相鬪
煽興馬服御燕欵相矜尙雖謹厚貧者咸務此不若不得比
人數而君族又有以貴雄者世故談指君爲富人顧獨乘羸
車攝敝衣冠敖然出衆中則大駭久之益落落無以自見乃
自顏其齋曰道山祿隱在翰林十年充書局纂修者再充京
兆分校者再兩遇 廷試亦再屈遂罷歸時年三十六說
者謂符昔夢云君通籍初遭母兄喪旋喪偶思親圖歸日夜
以冀旣得歸侍融融怡怡如其兒時退事著述益肆以醇閒
遇 國家慶典皇輿禹謨鎗佯 廟堂假羽飾喙頡輝鸞鳳

郵書屬草者使填於門負鼃蟠螭銘宮揭阡人交走幣恐後咸須君文以休萬祀身晦名顯日逾以崇乙酉清蹕南

巡有

詔徵在籍詞臣集試

闕下時虎文官京師或謂

曰此舉意在邵某也若與邵厚曷促之來予曰邵某病且母老恐不果來已而竟以疾辭不赴越四年卒春秋五十有二君貌清古豐下銳上首微窪如仰釜眉目疎秀短視精草章入晉人室每據案書望之若隱几臥者嚴冬喜脫履擁爐坐客至倉卒覓履不得隨取躡之履異旁觀竊視暱笑君覺之亦自笑已且復然終不以措意當金川之平也相國忠勇傅公旋師禮成坐朝房百官咸會君立門外面之取鏡諦視公呼入問曰若何視君微哂不答徑趨出其意度夷曠類如此與之遊者未嘗見愠色卽愠未嘗出聲氣性愛才喜獎借後

學嘗主毘陵龍城書院君歿士有喪之若父母者君一兄三弟齊烈乙丑進士選爲庶常卒於官齊熊舉人內閣中書舍人齊然齊烈同榜進士戊辰庶常今官戶部山西司郎中齊鰲附貢生皆賢而有文者配席安人太學生 贈文林郎永恂孫附貢生錦女有高行先卒君已葬而銘之繼配王安人資政大夫戶部侍郎原祁孫通奉大夫巡撫廣東兵部侍郎暮女子三男二人培憲昭文縣學附生聖籍蘇州府學增生聖藉少負志節務矯厲不同俗以自標置先君一年卒女一人適太學生趙貴鯤孫男廣鉉廣衡孫女二乾隆己丑十二月十二日辰時將葬君於席安人之封培憲余壻也使來連銘銘曰

斑斑之獸弗擾于周噉噉其音於桑之林於戲叔山古誰不

然而克以有于萬年維生不羸維後之成以鴻厥聲

贈中憲大夫壽張縣知縣沈君墓誌銘 王元啟

乾隆三十九年八月二十八日夜四鼓陽穀縣黨家店奸民王倫糾眾入壽張城爲亂知縣沈君聞變具衣冠出莅宅外斥曰吾非賊吏爾等劫我何爲賊伏拜曰知公廉我等亦素沐公恩但須及早從順順則生逆則死君駭曰爾等不顧赤族之誅乃欲反耶遂大罵賊謂公不知生死麾其眾曰我等且退令公靜自爲計遂退去君念賊雖退勢必復來卽入內解其印授其從祖叔父翰及兄于上麟令掘坎埋諸臥內旋復出眾賓親哭挽其臂勸令他逸君怒曰君等鬚髮半斑猶作兒女子語吾舍一死之外更何他往揮其臂疾趨宅外值家人牽馬至請君入省告急君曰若使吾蒙面見上官乎批

其頰而斥之須臾賊復至迫脅再三有涕泣求拜者一隨役亦爲泣求君大怒拳足交下曰汝官役俱欲從賊耶賊以兵脅之君毒罵不絕口賊至畏惡不忍聞乃遂攢殺之君素有惠政雖鄰邑皆感之會前數日間陽穀有妖人聚眾君遣人四出偵刺賊懼禍及首劫壽張君遂罹於難事聞

詔贈

中憲大夫加銜分巡道蔭一子遺官

諭祭於家賜葬烏

程縣其所之原君諱齊義字立人世居烏程之馬要鎮伯兄齊禮始登進士官檢討君領乾隆九年鄉薦三十一年大選天下舉人分發各省以知縣用君得山東厯署冠汶上費齊東四縣三十四年題授泗水歲餘以疾去三十七年復題授壽張享年五十有八君初往鉅野辦賑稽凡應賑之戶書名於冊君慮胥吏作奸賑時或易以他冊私有刪除輒手自登

記歷數十里皆然一不假手於人冠有剪辮之獄民訛言妖人剪人髮辮以咒語攝其魂令移他處錢物久已被剪者不數日輒卽死君訊無絲毫實悉縱去無所問後他縣獄上皆獲譴人始服君有識汶上爲入都孔道東門口石橋久圯君撤而新之南旺蜀山馬踏三湖爲漕渠水櫃隄壞君出資修築工固而民不擾泗水多閒田而民間畜蠶者少君悉令栽桑飼蠶自此隙地皆桑繭絲之饒甲他邑創設書院膏火令諸生得萃處其中時時入省其課講評不倦一時學使所選錄及膺鄉薦者悉出書院遠近慕作人之化費有寃獄君特緩其事或以吏議懼之君曰與其令民以寃死毋寧被劾去官齊東飢民多流食他所後聞賑米來歸冊已具不復能增君爲覈其口數悉加賑全活萬計壽張南鄙趙王河湮塞

三十餘年大雨至水無所洩禾麥皆淹死居民不能爲田多
逃去君請募夫開鑿凡三十餘里上引范僕諸水悉達諸五
空橋自是南鄙無水患民皆復業學宮明倫堂廢爲墟莽先
後更數十令莫一視君爲重建故明藩府私田賦極輕國
朝謂之更名地近奉部議加賦壽張更名地二千四百餘頃
先於雍正間歸入籽粒地加賦顧其名目猶存君檢尋舊牘
得其原委申請如故民以不擾民久欠倉穀不能償有
詔察其無力者予免君恐胥吏需以親詣諸鄉覈其饒乏故
事歲辦河工稽料及解京黃蠟分里購買吏緣爲奸利君往
他所買解民遂不復知有是累君所至求民利病若其身事
自鉅野汶上旋省民老幼婦女攜扶載道相送百里不絕泗
水一十四里里各鑄文以誌遺愛殉節後邑民號慟雌婦女

皆失聲來祭奠者不絕泗水汶上士民皆遠來哭奠君聽訟
用古教化法準情析理動以天性格以至誠在壽張一日方
聽事兩造相持慟哭聲震內衙諸賓親竊往窺之蓋邑民有
兄弟訟者君用數言開諭遂相與感泣歡好如初祖諱鼎元
早世父諱正烏程學生兩世皆以君伯兄貴得 贈封如其
兄之官娶陸氏繼張氏子男三懷忠縣學生麟太學生騏尙
幼女二一適某學生某一在室者君弟齊信所生君幼撫爲
己女十月二十一日君凶問至女號泣自縊死 詔爲建
坊以旌之孫男二嵩崧君性孝友嘗計偕北上旣治裝會其
弟病遂輟行爲留視湯藥弟卒收其殘孤撫養之與人交不
輕諾已諾必復其爲吏恂恂然凡可以致名聲博進取者一
切讓人於利所在畏避如懦夫至其臨大節獨奮然蹈白刃

而不懼豈非信道篤而自知明古所稱君子人與黨家店隸
陽穀南十一都倫於壽張首亂一時誤指爲壽張民世遂爭
以養惡咎君甚者謂奸民爲亂有司以苛政激之賴

天子聖明嘉君守土之義

特加閔恤君之節始獲顯聞

於世昔張巡殉節睢陽議者罪其食人愚其死守孔宗旦死
儂智高之亂人猶論其在京東時不能自重至爲世所指目
所謂好議論不樂成人之美者豈其自昔爲然與余與君同
年鄉舉慕君之節死而又悲其吏蹟闇而弗章會諸孤求墓
誌乃按其事狀爲博徵而覈著之庶以傳信於後旣又爲之
銘曰

史褒死節貴死其職失守奔亡雖死猶斥矯矯沈君不渝其
志赴死如歸莫之能制忠貞未剖讒矢集之曰此擾攘吏實

激之賊黨既俘大僚會鞠雖伊虺豺銜恩有夙剝膚剔肉辭
不再更君行彌彰

帝閔加旌我次君蹟勒銘茲石石人可磨銘昭無極

惺齋王先生墓志銘

翁方綱

先生諱元啟字朱賢號惺齋先世自杭遷嘉興曾祖國泰祖
承榮父昌業世有隱德先生幼卽有志聖賢之學不爲時俗
文字舉乾隆甲子浙江鄉試辛未成進士署福建將樂縣知
縣三月而罷然其釐訟獄禁賭博設十家牌平鹽價立排糶
之法禁質庫之重利濬溝渠修橋梁道路諸實政悉殫心力
爲之邑人以爲抵他令數十年之功旣以誣被吏議復至其
邑民扶老攜幼饋芻米汲爨及鄰境之民皆歡迎如慈母先
生雖於經濟未竟其志而教人之用尤著前後厯主講席於

延平道南書院者再又於仙遊之金石邵武之樵川順昌之華陽蓋在福建最人也河南則衛輝之崇本山東則濟南之樂陽蒿菴曹州之重華於其鄉則鎮海之鯢池三十年間十主書院之任所成就之士以學行文藝科目著顯者數千百人先生爲學以宋五子爲宗說經尤精於易而爲文一本韓子撰讀韓記疑十卷周易四書講義史記漢書韓非子孫可之歐曾王文集及錢文子補漢兵志諸書校正評註凡若干卷惺齋論文勾股九章論祇平居士文集恭壽堂家訓若干卷凡嗜學多文之士知考訂者輒多厭薄宋儒以自喜今日學者之通思也先生博極羣書勤考證工文詞而篤守程朱之旨終身勿貳誨人勿懈若先生者可謂真儒矣旣病革猶補註周易下經及易寶前一日猶命子尙繩改定順宗實錄

記疑條中二字蓋其貫天人古今之精力畢世以之先生生於康熙五十三年七月十一日卒於乾隆五十一年七月一日年七十有三娶沈氏例封孺人子男三天石早卒尙珪附監生四庫全書謄錄廣西候補縣丞尙繩增廣生孫男二克任國子生克新孫女一曾孫男一銘曰

孰能博綜漢唐而篤執程朱淵哉若人不見是圖學則伯厚東發教則鹿洞蘇湖蓋超出乎籍湜紹述間而獨爲韓之徒鄉貢進士候選知縣涂詠菴先生墓誌銘

魯九皋

自宋紹興中析南城之東南五鄉置新城縣而先是李泰伯先生實爲縣境內人閱三百餘年當明嘉隆之世徵君鄧潛谷先生出焉其學精究於夫人之奧而博觀夫歷代王路之

隆污著爲函史五經繹諸書證同辨異旁推交通聿歸一致
其一時之學者若何正部屋馮太僕渠先後繼起莫不各本
心得而實措諸行事故新城之士其能有志於學而不靡於
俗者類皆闕然爲已不事表襮蓋泰伯潛谷二先生之風尙
使然也 國初涂宜振先生以前明家宰貴公子篤志於學
其後人傳其遺風有太學海門先生學珙者遇廣昌黃崧甫
先生與語悅焉因館崧甫於家而俾其子弟從之遊詎菴先
生海門之從弟崧甫之高第弟子也諱瑞字榮詔諷菴其號
當先生師事崧甫時年方童稚耳其族兄南池先生登故嘗
受業於海門而與崧甫友善先生每與聞講論輒心識焉自
崧甫成進士官部曹以至出爲郡守十餘年中先生閉戶獨
學於家惟數從南池先生考證所得而與陳凝齋先生道相

勵其行甚勤凝齋先生亦崧甫弟子也先生性坦易與物無忤居家無所矜飾其一門羣從子弟甚衆先生皆身教之宗族親戚遇疑事競來質難其有忿爭者得先生一言而平讀書博觀約取好稽考成迹以爲師法爲文章未嘗求工而真意所貫光明洞達讀者皆以爲有用之文也所著有東里文集經疑編經濟編史論編理學編皆藏於家先生生於康熙四十八年二月戊辰卒於乾隆三十九年十一月丁卯得年六十有六舉乾隆十二年鄉試揀選知縣娶楊氏妾某氏子男子二年皆甫九歲某嘗從遊於南池凝齋二先生而辱先生以爲忘年友先生之卒也某視含殮焉南池先生復命某爲志其墓因厯叙新城之學者系諸首竊以爲如先生者真不愧鄉先輩之風也嗚呼今其亡矣銘曰

道旣通志未窮手纂筆錄方緝厥功將欲託諸庸胡遽溘然以終後有學者想其遺風

太學生魯公諒夫墓誌銘

魯九皋

環中田而居魯氏爲多蓋自宋元至今厯數百年世旣久族日大且繁其先類皆敦詩書務稼穡渾然仁厚君子之風也二十年間老成衰謝習俗漸趨浮薄而先輩流風其存焉者寡矣今又失吾諒夫可悲也夫公諱曰宏字希哲諒夫其號也少豪雋不羈讀書爲文好以已意自見不甚循儒先傳註與夫有司之繩尺然識者未嘗不嘉其才也年十八籍郡庠屢困鄉試不遇尋得手疾於是援例入太學公旣爲太學生絕意科名棄舉子業益好讀書自厯代正史旁及稗官野乘與夫莊列釋老之書無不叅稽而遍考之然不著詩文曰吾

非爲名者也聊以適吾事而已晚年益深自韜晦閉一室左右圖書自子孫而外罕有見其面者然族中後生欲聞先輩遺事者每樂就公公亦樂爲之語年今八十有三一日無疾而終於是魯氏又失一老成人矣配孔氏無出繼王氏丈夫子四側室某氏生丈夫子三孫九人曾孫一人某故嘗與公之諸子遊而得聞笑語於公者也某孫雲又從某學爲古文先五年王孺人之卒某已爲之誌今其諸子又屬銘公其何能辭銘曰
我我祖龔棲靈之北厥嬪二人先歸於此於焉合葬爰厥形體感余心之怛怛溯古處而長企